

Na osnovu članova 15.-20. Zakona o Poreznoj upravi Federacije Bosne i Hercegovine (□Službene novine Federacije BiH□, broj 33/02) i Zakona o standardnoj klasifikaciji djelatnosti u Federaciji BiH (□Službene novine Federacije BiH□, broj 6/95), federalni ministar finansija donosi

PRAVILNIK

o

odjeljivanju identifikacionih brojeva i poreznoj registraciji poreznih obveznika na teritoriji Federacije Bosne i Hercegovine

I □ OPĆE ODREDBE

Član 1.

Ovim pravilnikom propisuje se sadržaj i način dodjeljivanja identifikacionog broja poreznom obvezniku, utvrđuju se organi nadležni za dodjeljivanje ovih brojeva, proces porezne registracije poreznih obveznika, kao i dokumentacija potrebna za dodjeljivanje identifikacionih brojeva i poreznu registraciju poreznih obveznika na teritoriji Federacije Bosne i Hercegovine (u daljem tekstu: Federacija).

Član 2.

Identifikacioni brojevi formiraju se i dodjeljuju prema odredbama ovog pravilnika svim pravnim licima, drugim organizacijama, kao i fizičkim licima koja samostalno obavljaju djelatnost, a za fizička lica □ građane u porezne svrhe koristi se jedinstveni matični broj građana, koji dodjeljuje Federalno ministarstvo unutrašnjih poslova □ Federalno ministarstvo unutarnjih poslova.

Član 3.

Dodjeljivanje identifikacionih brojeva i porezna registracija poreznog obveznika vrši se u skladu sa Zakonom o Poreznoj upravi Federacije Bosne i Hercegovine (□Službene novine Federacije BiH□, broj 33/02) (u daljem tekstu: Zakon), a na način propisan ovim pravilnikom. Identifikacioni brojevi poreznih obveznika moraju se koristiti u skladu sa odredbama člana 15. Zakona.

Član 4.

Odredbe ovog pravilnika primjenjuju se na svako lice od kojeg se Zakonom, poreznim zakonima i podzakonskim aktima zahtjeva da poreznim organima podnesu prijavu, izjavu ili drugi dokument.

Član 5.

Porezna registracija poreznog obveznika vrši se na osnovu prijave za registraciju koju podnosi porezni obveznik, odnosno odgovorno lice u njegovo ime. Uz prijavu za registraciju podnose se dokumenti propisani ovim pravilnikom.

Član 6.

Poreznu registraciju poreznih obveznika vrši kantonalni ured Porezne uprave Federacije Bosne i Hercegovine (u daljem tekstu: Porezna uprava) za obveznike čije je sjedište na području tog kantona, a u skladu sa članom 17. Zakona. Kantonalni ured Porezne uprave

registruje porezne obveznike u svojim prostorijama, odnosno prostorijama kantonalne službe/ureda Federalnog Zavoda za statistiku (u daljem tekstu: Zavod) gdje se istovremeno dodjeljuju identifikacioni brojevi poreznim obveznicima.

Izuzetno od stava 1. ovog člana, poreznu registraciju poreznih obveznika sa sjedištem izvan Federacije vrši Središnji ured Porezne uprave. Središnji ured Porezne uprave registruje porezne obveznike u prostorijama kantonalnog ureda Porezne uprave u Sarajevu.

Član 7.

U statističke svrhe, Zavod formira Registar i Biznis registar svih lica koji imaju 13-cifreni identifikacioni broj izdat od strane Zavoda.

Podaci iz registara iz stava 1. ovog člana dostupni su svim organizacijama i institucijama Federacije, bankama, sudovima i drugim korisnicima. Vrste podataka koje mogu koristiti različiti korisnici, biće regulisane Pravilnikom o korištenju podataka registara kojeg donosi direktor Zavoda.

II □ POSTUPAK DODJELJIVANJA IDENTIFIKACIONIH BROJEVA I POREZNE REGISTRACIJE PRAVNIH LICA I DRUGIH ORGANIZACIJA

Član 8.

Porezna registracija i dodjela identifikacionih brojeva pravnim licima i organizacijama vrši se na sljedeći način:

1. porezni obveznik - pravno lice ili organizacija dužan je sutradan, a najkasnije u roku od pet (5) radnih dana od dana dobivanja rješenja o upisu u sudski registar u skladu sa Zakonom o postupku upisa pravnih lica u sudski registar (□ Službene novine Federacije BiH □, broj 4/00, 49/00 i 32/01), odnosno drugog dokumenta na osnovu kojeg se vrši osnivanje pravnog lica ili organizacije, podnijeti nadležnom kantonalnom uredu/službi Zavoda sljedeće dokumente:

a. dva primjerka popunjenog obrasca prijave poreznog obveznika - pravnog lica ili organizacije (obrazac PPL-1) za dobivanje identifikacionog broja i poreznu registraciju. Obrazac prijave je sastavni dio ovog pravilnika.

b. kopiju rješenja o upisu u sudski registar ili odluku o osnivanju pravnog lica ili organizacije ili drugi dokument na osnovu kojeg se vrši osnivanje pravnog lica ili organizacije,

2. Na osnovu navedene dokumentacije, nadležni kantonalni ured/služba Zavoda, u skladu sa svojom metodologijom rada, dodjeljuje 13-cifreni identifikacioni broj poreznom obvezniku □ pravnom licu ili organizaciji.

3. Obavještenje o dodjeljenom identifikacionom broju (u daljem tekstu: Obavještenje), zajedno sa prijavom i ostalom dokumentacijom iz tačke 1. ovog člana, prosljeđuje se radniku Porezne uprave ovlaštenom za registraciju poreznih obveznika.

4. Ovlašteni radnik Porezne uprave, u skladu sa instrukcijom koju izdaje Porezna uprava, procjenjuje da li porezni obveznik □ pravno lice ili organizacija ispunjava sve uslove za poreznu registraciju utvrđene u instrukciji.

5. Ako se utvrdi da porezni obveznik □ pravno lice ili organizacija ispunjava sve uslove za registraciju kod Porezne uprave, ovlašteni radnik registruje poreznog obveznika i izdaje mu Obavještenje i Uvjerjenje o poreznoj registraciji, koje sadrži i identifikacioni broj poreznog obveznika □ pravnog lica ili organizacije, prethodno dodjeljenog od strane

nadležnog kantonalnog ureda/službe Zavoda.

6. Ako porezni obveznik pravno lice ne ispunjava sve uslove za registraciju kod Porezne uprave, proces porezne registracije se privremeno obustavlja dok se propisani uslovi ne ispune.

Član 9.

Porezna registracija i dodjeljivanje identifikacionih brojeva podružnicama i jedinicama u sastavu pravnog lica ili organizacije na teritoriji Federacije vrši se na osnovu prijave (obrazac PPL-2), a po odredbama člana 8. ovog pravilnika, prema sjedištu pravnog lica ili organizacije u čiji sastav podružnice ili jedinice ulaze.

Član 10.

Porezni obveznik pravno lice ili organizacija, dužan je uvjerenje o poreznoj registraciji poreznog obveznika istaknuti na vidnom mjestu na lokaciji sjedišta poreznog obveznika. Uvjerenja za podružnice pravnog lica ili druge organizacije istaknuće se na lokaciji te podružnice.

Član 11.

Identifikacioni broj sastoji se od 13 cifara koji se formira na sljedeći način:

- prva cifra je 4 koja označava da je identifikacioni broj formiran i izdat u Zavodu.
- druga cifra je 2 koja označava da se radi o poreznom obvezniku - pravnom licu ili organizaciji sa teritorije Federacije.
- narednih sedam cifara predstavlja brojeve koje prema svojoj metodologiji dodjeljuje Zavod.
- naredne tri cifre određuju podružnice i poslovne jedinice pravnog lica i mogu dobiti vrijednost od 001 do 999. Ako pravno lice nema podružnica ili poslovnih jedinica, tada su ove tri cifre 000.
- trinaesta cifra je kontrolni broj za prethodnih dvanaest cifara identifikacionog broja.

Član 12.

Nadležni sud koji registrira pravna lica u skladu sa Zakonom o postupku upisa pravnog lica u sudski registar, odnosno organ koji je prema federalnim zakonima nadležan za registraciju drugih organizacija, obavještava nadležni kantonalni ured Porezne uprave i kantonalni ured/službu Zavoda o registraciji, ponovnoj registraciji, stečaju ili likvidaciji ili reorganizaciji pravnih lica ili organizacija isti dan, a najkasnije u roku od pet (5) radnih dana od dana registracije, ponovne registracije, ili od početka postupka stečaja, likvidacije ili reorganizacije pravnog lica ili organizacije.

III POSTUPAK DODJELJIVANJA IDENTIFIKACIONIH BROJEVA I POREZNE REGISTRACIJE FIZIČKIH LICA - PODUZETNIKA

Član 13.

Postupak porezne registracije i dodjele identifikacionih brojeva fizičkim licima poduzetnicima vrši se na način utvrđen u članu 8., 9., 10. ovog Pravilnika, uz podnošenje sljedećih dokumenata:

- a. dva primjerka popunjenog obrasca prijave poreznog obveznika - poduzetnika (obrazac PFL-3) za dobivanje identifikacionog broja i poreznu registraciju. Obrazac prijave je

sastavni dio ovog pravilnika.

b. odobrenje za obavljanje samostalne djelatnosti izdato od strane nadležnog općinskog organa.

Uvjerenja o poreznoj registraciji koja se izdaju poreznim obveznicima poduzetnicima pohranjivaće se na svakoj lokaciji gdje porezni obveznik obavlja poslovne aktivnosti.

Član 14.

Identifikacioni broj poreznog obveznika poduzetnika sastoji se od 13 cifara i formira se na sljedeći način:

- prva cifra je 4 koja označava da je identifikacioni broj formiran i izdat u Zavodu.
- druga cifra je 3 koja označava da se radi o poreznom obvezniku poduzetniku sa područja Federacije.
- narednih sedam cifara predstavlja brojeve koje prema svojoj metodologiji Zavod dodjeljuje poreznom obvezniku poduzetniku u svrhu njegove identifikacije. Ovaj broj je različit za svako fizičko lice - poduzetnika.
- naredne tri cifre određuju poslovne jedinice poduzetništva i može dobiti vrijednost od 001 do 999. Ako poduzetništvo nema poslovnih jedinica, tada su ove tri cifre 000.
- trinaesta cifra je kontrolni broj za prethodnih dvanaest cifara identifikacionog broja poreznog obveznika poduzetnika.

Član 15.

Organ uprave ili drugi nadležni organ koji registruje fizička lica poduzetnike u skladu sa zakonima Federacije obavještava nadležni kantonalni ured Porezne uprave i kantonalni ured/službu Zavoda o fizičkim licima poduzetnicima koja su registrovana, čija je registracija poništena u roku od pet (5) radnih dana od dana izdavanja, oduzimanja ili poništenja rješenja o obavljanju djelatnosti.

IV OBAVEZE POREZNIH OBVEZNIKA

Član 16.

Ukoliko porezni obveznik, trenutno registrovan prema odredbama ovog pravilnika, promjeni djelatnost, mjesto poslovanja, vlasništvo, rukovodno lice, kapital, pravni status ili bilo koji drugi element svog poslovanja, osnuje i briše podružnicu ili jedinicu u svom sastavu, tada je porezni obveznik dužan sutradan, a najkasnije u roku od pet (5) radnih dana, u pismenoj formi o toj promjeni obavijestiti nadležni kantonalni ured Porezne uprave i nadležni kantonalni ured/službu Zavoda.

Ukoliko porezni obveznik, trenutno registrovan prema odredbama ovog pravilnika promjeni svoje sjedište, a novo sjedište je u nadležnosti drugog kantonalnog poreznog ureda, a ne kantonalnog poreznog ureda kod kojeg je porezni obveznik trenutno registrovan, tada je porezni obveznik dužan sutradan, a najkasnije u roku od pet (5) radnih dana u pismenoj formi o toj promjeni obavijestiti oba kantonalna porezna ureda i oba kantonalna ureda/službe Zavoda.

V PRELAZNE I ZAVRŠNE ODREDBE

Član 17.

Porezni obveznici pravna lica, koji posjeduju 8-cifreni identifikacioni broj ranije izdat od strane Zavoda, dužni su, najkasnije u roku od tri mjeseca od dana primjenne ovog

pravilnika, postupiti po odredbama članova 8. i 12. ovog pravilnika. Porezni obveznici koji nisu u postupku likvidacije, a koji u datom roku ne postupe prema stavu 1. ovog člana, podliježu postupku inspekcijskog nadzora Porezne uprave.

Član 18.

Pravnim licima koja nisu izvršila usklađivanje svog statusa kod nadležnog registarskog suda u skladu sa odredbom člana 382. Zakona o privrednim društvima (Službene novine Federacije BiH, br. 23/99 i 45/00) neće se dodjeljivati identifikacioni brojevi niti vršiti porezna registracija dok ne izvrše pre-registraciju, odnosno ne donesu potvrdu nadležnog registarskog suda da je postupak pre-registracije u toku.

Član 19.

Porezni obveznici i poduzetnici koji, do donošenja ovog pravilnika, posjeduju Odobrenje za obavljanje samostalne djelatnosti izdato od strane nadležnog općinskog organa, dužni su, najkasnije u roku od šest mjeseci od dana objavljivanja ovog pravilnika u Službenim novinama Federacije BiH, postupiti po odredbama članova 13. i 15. ovog pravilnika. Porezni obveznici koji u datom roku ne postupe prema stavu 1. ovog člana, podliježu postupku inspekcijskog nadzora Porezne uprave.

Član 20.

Na sve porezne obveznike koji ne postupaju po odredbama ovog pravilnika primjenit će se kaznene mjere iz Zakona.

Član 21.

Ovaj Pravilnik stupa na snagu narednog dana od dana objavljivanja Pravilnika u Službenim novinama Federacije BiH, a njegova primjena počinje 45 dana od dana stupanja na snagu ovog pravilnika za porezne obveznike sa područja cijele Federacije. Izuzetno od prethodnog stava, primjena ovog pravilnika za porezne obveznike s područja kantona Sarajevo počinje 30 dana od dana stupanja na snagu ovog Pravilnika.